

GALÁCIA EIPI WATWAT PEAPTUP PAULO EMUMUDUPMUBARARAKTUP

¹⁻² Galácia eipi watwat, cartadup mubararağ òn eywebeaptum—Jesus Cristo kayayũ beaptum. Òn Paulo. Ijodiat ġu juk onomuwã Jesus Cristo emumujum. Deus warara'acat pe ġu onomuwãat Jesus Cristo emumujum.

Jesus Cristo ma juk o'e owebe: — Wekawẽn muwẽnuwẽn'ukan cuy ece — i.

Ixe ebay dak imẽn o'e owebe—Deus ma. Ixe Deus waram Jesus Cristo o'ğutait ce'ũap tomukadi. Kato mujujum òn eywebe ijudup pe. Soat e'em kato'i eywebe oxeacat tak—Jesus kayacat—wuykitpitpiyũ.

³ — Bay, xipan cuy Galácia eipi watwat ejukuk — i òn e'em Deus pe—wuyebay be, Jesus Cristo be dak—wuykukukat pe. — Ixeyũ ağyumbabibin cuy eğuy — i òn e'em cebe ip.

⁴ Cristo oe'ũ ikẽrẽat uk am soat pewi wuywebewi. Oe'ũ wuywebe Deus kay'ũmat ekukuap tağ wuyekuap puxim. Jeweweju ma oe'ũ. Oe'ũ Deus bikuyap tağ—wuyebay bikuyap tağ. ⁵ Imẽnēju:

— Bay, soat podi ma ěn edipap kuğ — i juy ace Deus pe. — Bay, soat podi ma a'òbaca — i dak cuy ace cebe.

Soat em ma juy imẽn acece cebe.

⁶ Wağyubabi'ũm'ũm cĩcã eykuğ! Ibun ġu eyetabut Deus kay. Gaxĩn ma jeyağyuba'ũm cekay. Kuy ġu juk eyetabut epesop cekay. Ixe juk

eynaẽ jebekitkiyũm. Jekpot kukap co'i xipan eykuḡ—Cristo kukap co'i. Eyju bit eybu'u ḡuto epesop cekay. Warara'acat ekawẽn kay dak eyju ḡasũ bit.

— Ijop ekawẽn kawẽn idipat ocexe — i eyju e'em te'e ma.

⁷ Warara'acat ekawẽn pit kawẽn idipat ḡu—Jesus ekawẽn acã. Warara'acayũ bit eymu'ukpiceḡẽn ojuy. Eymubu'un ojuy ip Jesus ekawẽn kay. Cristo ekawẽn muwarururun ojuy ip. Imẽnpuye waḡuybabi'ũm'ũm cĩcã eykuḡ. ⁸ Kuy juk adi kawẽn idipat oceḡuwẽnuwẽn eywebe—Jesus ekawẽn. Gasũ bit kuka wara'at ekawẽn ma oceḡuwẽn eywebe.

— Ijop ekawẽn ma kawẽn idipat — i kuka oce'e eywebe napa ma.

Imẽn oce'e buje, Deus kuka ocemuju ipiat'ajojoap kay. Gasũ bit kabi bewiat kuka wara'at ekawẽn o'ḡuwẽn eywebe.

— Ijop ekawẽn ma kawẽn idipat — i kuka o'e eywebe napa ma. Imẽn i'e buje, wũy ma jeenuy Deus wi ipiat'ajojom. ⁹ Kuy juk iboap oceḡuwẽn eywebe. Imẽnpit ḡuto waram oceḡuwẽn eywebe. Kuy bima juk adi eyetabut epesop kawẽn idipat kay. “Ijop ekawẽn ma kawẽn idipat” i'e'em napa ma wara'at ekawẽn ma imuwẽn puje, wũy ma jeenuy Deus wi ipiat'ajojom. ¹⁰ Õn pit ijodiat mucokcok pin ḡu oce. Deus mucokcok pin acã õn pit. Warara'acayũ be “Paulo xipat cĩcã” i'e'eap kudadam ḡu õn. Ijodiacat mucokcok pin pima, kuka Cristo a'õ kay kũyjobican ḡu oce!

¹¹ Okitpitpiyũ, ijodiat ekawẽn muwẽnuwẽn ḡu bit õn. Ijodiat ekawẽn ḡu ma i ḡuto õn e'em

eywebe. ¹² Ijodiat ġu juk kawēn idipat o'ġuwēn owebe. Ka'ūma ma juk omutaybitbin ijodiat pit. Jesus Cristo acā juk adi omutybitbin.

¹³ Judeuyū etabucap co'i wetabun puje, juk adi ipiat osupi'ajojoat Jesus kay itabucayū be. Kuy eyetaybit apēn cuk adi ojekukuku iam. Wetakoma jījā juk adi oġuy ixeyū kay. Yaoka ojuyjuy ip cuk adi oġuy. Imēn cuk adi ojekukuku Jesus Cristo odopabijuk'ūm pima. ¹⁴ Waġuywaġoyū bodi ma juk adi wetabut oġuy Deus kay. Judeuyū babim cuk adi wetabut oġuy. Cebodi ma ip we'ajojoyū'ūm'ūm ekawēn taġ cuk adi jeku ojuyjuy oġuy.

¹⁵ Deus pit cuk onaē jekawēn muwēn ām, warara'acat podi ma ixexipan okuġ puye. Okap awap ma juk onaē. ¹⁶ Ixe juk jekpot o'ġubapuk owebe.

— Okpot cuy eġuwēnuwēn Judeu'ūmayū be — i juk adi o'e owebe. — Kawēn idipat cuy eġuwēnuwēn cebe ip — i juk adi o'e o webe.

Imēn i'e buje, ka'ūma kay ma juk oju wawē ām. ¹⁷ Jerusalém ka be dak cuk oju ġu Jesus emumujuyū eju kawēn ām—kuy bima Deus o'taē'iaiyū eju kawēn ām. Ixeyū be wawē ām ġu juk oju. Arábia eipi kay bit cuk oju. Guyjom acā juk ocepit Damasco ka kay. ¹⁸ Ebpūġ koato kap puje juk oju Jerusalém ka kay Pedro jom. Xepxep esemana ma juk adi oġuy cexe. ¹⁹ Warara'acayū bit cuk ojojojo ġu Jesus emumujuyū. Tiāġo acā ġuto ojojojo—wuykukukat Jesus kitpit acā.

²⁰ Napa ġu ōn e'em eywebe. Deus ojojom ijudup mubarararaġ pima.

²¹ Pedro eju wekawēn epere buje, Síria eipi daḡ cuk adi ojekukuku, Cilícia eipi daḡ tak. ²² Imēnpuye Cristo kay itabucayũ ojojjo ḡu ip—Judéia eipi watwat—wara'at ka daḡ ōn jekukum puye. ²³ Warara'acat ekawēn pit cuk ip o'jojjo kuy.

— Paulo juk adi ipiat o'supi'ajojoat wuywebe — i'e'em warara'acayũ itabucayũ jewewebe. — Jesus kay wuyetabucap mu'ũm ojuy osunuy — i'e'em ip. — Gasũ bit ixē dak Jesus muwēnuwēn o'e! — i'e'em ip. — “Jesus kay juy eyetabun epesop!” i'e'em ixē ma — i'e'em ip.

²⁴ Wawēḡ co buje:

— Bay, ēn soat podi ma a'ōbaca — io'e ip Deus pe. — A'ōbacaam cuk Paulo eḡutabun ekpot kay — io'e ip cebe.

2

¹ Catorze koato kap puje, ocepit Jerusalém ka kay. Barnabé eju oju. Tito dak otujowat oweju.

² Ibo ka kay oju “Jerusalém ka kay juy eju” i juk adi Deus o'e owebe buye. Jesus kayayũ kukuk'ukayũ o'je'awero wa'ĩjo am. Warara'acayũ eju ḡu juk ocekawēn—ixeyũ eju acã. Apēn cuk adi kawēn idipat oḡuwēnuwēn Judeu'ũmayũ be iap oḡuwēn cebe ip. Apēn cuk adi ixeyũ oḡutaybitbin iap tak oḡuwēn ma. Obu'u juk adi oḡuy ixeyũ be “Te'e ma juk adi eḡutaybitbin ip cedaḡ'ũma ēn imutaybitbin puye” i'e am owebe. ³ Wuykitpit Tito juk otujowat owebe. Judeu ḡu ixē.

— Teku juy ataypu'aḡobixeedakacat wuydobuyũ'ũm'ũm pabi daḡ—Deus ekawēn taḡ — i'ũmḡu o'e ip itabucayũ kukuk'ukayũ ma—Judeuyũ ma.

⁴ Warara'acayũ bit oõm oce'aweroroap'a be, o'gukũyjo ġu ma'ġu ip. “Oceju dak ocetabut Jesus kay” i napa ma e'e'ukayũ oõm ip ocekawẽn co am oca'õxikap ojuy. Jewemukorẽm ojuy ip.

— Teku juy ataypu'aġobixeedakacat wuydobuyũ'ũm'ũm ekawẽn taġ — io'e ixeyũ ma. — Apẽnpuye dak eybu'u wuydobuyũ'ũm'ũm pabi daġ jekum Jesus eju mũġ'i eyeku buje? — io'e ip ocewebe. — Imẽn cũġ ġu Deus xe — io'e ip ocewebe. — Wuydobuyũ'ũm'ũm pabi daġ cuy epeku, Jesus kay a'ġu eyetabut ma — io'e ip ocewebe.

⁵ Ixeyũ ekawẽn kay ġu bit oceju—pũġ em tak ka'ũma.

— Ha'a wuydobuyũ'ũm'ũm pabi daġ cuy ajeku cũġ ma wuy'e am Deus xe — i'ũmġu juk adi oce'e oceju bit.

Imẽn oce'e buje, kuka juk kawẽn idipat oceġuwarurun. Ijo'i ġu kuka juk o'e. Imẽn oce'e buje, eymuġuykuku kuka juk oceju.

⁶ Iġo'a be o'je'awero ip itabucayũ kukuk'ukayũ. Soat xe ya'õbuyxi ip osodop. Yoboġ ġu ip oxe bit ijodiat pit. Deus kacũġ kay ġu aġ—badi acã. Iisuan ġu ixeyũ bit omutaybin.

— Wara'an pit cuy eġutaybin Judeu'ũmayũ — i'ũmġu o'e ip owebe. ⁷ — Deus cuk Paulo o'jomuy kawẽn idipat muwẽn ãm Judeu'ũmayũ be. Judeuyũ be bit Pedro o'jomuy kawẽn idipat muwẽn ãm — io'e ip jewewebe.

⁸ Deus ja'õbacaap o'ġũm owebe jekawẽn muwẽn ãm Judeu'ũmayũ be. Ixe emumuju õn. Judeuyũ be bit jekawẽn muwẽn ãm ja'õbacaap o'ġũm Pedro be.

9 — Deus Paulo mujujum jekawēn muwēn ãm Judeu'ũmayũ be — io'e ip itabucayũ kukuk'ukayũ—Tiago, Pedro dak, João dak. Imēnpuye juk ip obumukuḡ. Barnabé bumukuḡ tak ip jeburerexi ip puye.

— Judeu'ũmayũ be eyju ma juy Jesus ekawēn epeḡuwēnuwēn. Ocejū bit cuy Judeuyũ be oceḡuwēnuwēn — io'e ip. ¹⁰ Pũḡ ma ip ocemuḡebu. — Gbum cuy epesop tadaybotbocayũ kay—itabucayũ kay—ocexeayũ kay — i juk o'e ip ocewebe. — Dinheiro'in cuy epeḡudot cekay ip, ka'ũma kuḡ puye — i juk o'e ip ocewebe.

Õn tak ocokcok cĩcã oce imudot am.

¹¹ Guyjom ma Pedro oajēm ocekey, oceju Antioquia ka be bima. Õn pit xeku oḡukorēm warara'acayũ etabun ma, warēmtaḡ ma jekukum puye. ¹² Tiago jebureyũ o'ḡudot ocekey. Antioquia ka be ip oajēm. Ixeyũ ajēm'ũm pima, Pedro jekõnkõn'uk osunuy itabucayũ eju—Judeu'ũmayũ eju—Judeuyũ babi daḡ jekuku'uk'ũmayũ eju—taypu'aḡobixeedakatkat'ũmayũ eju. Tiago bureyũ ajēm puje bit, ibu'u o'e jekõn ãm ceweju ip—Judeu'ũmayũ eju. Iparara osunuy Judeuyũ buxim— “Judeu'ũmat jedaypu'aḡobixeedakacan cuy cũḡ ma i'e am Deus xe, itabut ma'ḡu ip Jesus kay” i'e'e'ukayũ buxim. ¹³ Imēnpuye Pedro buxim o'e ip warara'acayũ Judeuyũ. Pũḡ taḡ ma oeku ip jeweweju Judeuyũ. Jeparara pibun ibu'u o'e ip Judeu'ũmayũ eju jekum. Barnabé dak ixeyũ buxim iparara o'e. Pũḡ taḡ ma oeku Judeuyũ eju. Judeu'ũmayũ eju bti ibu'u o'e jekum jeparara pibun. ¹⁴ Cũḡ ḡu o'e ip jekukum. Kawēn idipat taḡ

ġu ip jekukum o'e. Iboap co buje juk ocekawēn Pedro eju warara'acayū etabutpe.

— Ēn Judeu — i juk oce cebe. — Inaka Judeu'ūmat co'i ēn jekukum — i juk oce cebe. — Judeu ekukuap puxim ġu ēn jekukum — i juk oce cebe. — Apēnpuye dak ēn e'em Judeu'ūmayū be “Judeuyū babi daġ cuy epeku!” i? — i juk oce cebe.

¹⁵ Oceju bit Judeuyū ocekapap pin ma.

— Ikērēat mujurūgrūġ'ukayū Judeu'ūmayū — i oceju e'em, ocedobuyū'ūm'ūm ekawēn taġ ġu ip jekukum puye.

¹⁶ Wuyju bit kuy wuyetabut Jesus Cristo kay. Deus xe wuyju cūġ ma wuydobuyū'ūm'ūm ekawēn taġ wuyekuap tomuju ġu—wuyetabucap tomuju acā. Deus xe wuyju cūġ ma wuydobuyū'ūm'ūm ekawēn taġ jekukum puye ġu—wuyetabut puye acā. Ka'ūma ma cūġ ma Deus xe jedobuyū'ūm'ūm ekawēn taġ jekuap tomuju.

¹⁷ — Cristo kay wuyetabun puje acā cūġ ma acesop Deus xe, wuydobuyū'ūm'ūm ekawēn taġ jekukum ġu ma'ġu wuyju — i wuyju e'em.

Imēn i'e buje, ibapuk e'em soat pe Judeu'ūmayū jo'i ma wuyju dak ikērēat muġēġē'ukayū iap. Ibu'u ġu paxi Cristo je'e wuywebe ikērēat muġē ām? Ibu'u ma! Cedaġ ġu cexe. Ijo'i ġu cexe.

¹⁸ — Wuydobuyū'ūm'ūm ekawēn taġ wuyekukuap tomuju ġu wuyju cūġ ma Deus xe—wuyetabucap tomuju acā — i'e'e'uk cuk adi oġuy. Imēnpuye “Wuydobuyū'ūm'ūm ekawēn taġ cuy ajeku cūġ ma wuy'e am Deus xe” o'e buje, kuyat wekawēn kuka ocepere, wuydobuyū'ūm'ūm pabi dak kuka oġupubutbun.

19 Iba'ore owebe cūḡ ma i'e am Deus xe wuydobuyũ'ũm'ũm ekawēn taḡ wekuap tomuju. Deus ekawēn tup cocom cuk wetaybin iboam. Iba'ore soat pe wuywebe soat iboap ekawēn taḡ jeku am. Wuydobuyũ'ũm'ũm pabi daḡ wuyekuap tomuju wuyju cūḡ ma Deus xe ibima apēḡām Cristo oe'ũ korosa be? Ka'ũma ām ma! ²⁰ Jekpiwan ma Jesus oe'ũ korosa be owebeam iap kay wetabut pima, obikuyap taḡ ḡu ōn jekukum. Cristo biōḡbuk omuy owebe. Kuyje wekukukuap kuy ocepere. Deus ipot kay wetabucap eju ōn jekukum ḡasũ bit. Ixe ipot jekpiwan ma oe'ũ we'ũap puxim, okukpin cĩcã cexe buye. ²¹ Deus ibikuy soat kuk am xipan.

— Okuḡ ḡu juy! — i'ũmḡu ōn pit e'em cebe. Ōn pit imēn ḡu e'em. Wuydobuyũ'ũm'ũm pabi daḡ wuyekuap tomuju wuyju cūḡ ma Deus xe ibima, apēḡām Cristo oe'ũ korosa be? Ka'ũma ām ma!

3

¹ Galácia eipi watwat, eyaḡuyba'arēm cĩcã! Abu dak cuk eymuḡuykuku? Abu dak cuk eymubu'un kawēn icēmat taḡ eyekuap puxim? Apēn Jesus Cristo oe'ũ korosa be iap cuk adi oceḡuwēn eywebe. Ibaḡuḡ ma juk adi oceḡuwēn eywebe. Imēnpuye juk adi eyetabut cĩcã epesop cekay. ² Pũḡ ḡu buk oḡuwēn eywebe. Deus jebiōḡbuk o'ḡuōm eywebe wuydobuyũ'ũm'ũm ekawēn taḡ eyekuap puye ḡu! Ibiōḡbuk oōm eywebe apēn Cristo oe'ũ iap ekawēn eyetaybit puye; iboap ekawēn kay eyetabut puye dak. ³ Eya'ōbacaam ḡu juk epesop Deus ebekitkiyũm—Deus biōḡbuk a'ōbacaam acã. Ḡasũ bit:

— Wuya'õbacaam ma ixé a'õ dağ ajeku — i eyju e'em te'e ma.

Eyağuyba'arēm cīcā dak epesop. ⁴ Kuy bima juk adi eyetabut cīcā epesop Jesus kay, ipiatpi'ajojoan mağū ip eywebe itabut'ũmayũ. Gasũ bit xe'e jeybu'un cekay? Te'e ma du juk adi ipiat epe-supi'ajojo? Iba'ore! ⁵ Deus cuk adi jebiõğbuk a'õbacaap o'ğũm eywebe. Ixe a'õbacaam wuywebe i'e ba'oreat cuk adi epeğubapukpukpuk soat etabutpe. Ja'õbacaap o'ğũm eywebe wuyawewēap ekawēn tağ eyju jekukum puye ğu. O'ğũm eywebe eyju Deus ekawēn kay jījā buye, cekawēn kay eyetabut puye dak.

⁶ Abraão etabucap puxim eyju dak cuk adi eyetabut epesop Deus kay. Imēn Deus Abraão o'ğuwēn: — Ixe juk adi itabut cīcā osunuy okay — i. — Imēnpuye cūğ ma osunuy oxé i.

⁷ Ixe-buxim itabucayũ Abraão naxeğebitbicayũ Deus xe, Judeuyũ ğu ma'ğū ip. Iboam cuy eyetaybin. ⁸ Deus cuk adi o'e jewebe ma:

— Guyjom cūğ ma jeedop ip oxé warara'acayũ dak—Judeu'ũmayũ — i. — Itabun puje ip cūğ ma jeedop ip oxé Judeuyũ jo'i ma — i juk adi o'e jewebe ma.

Imēnpuye imēn e'em Deus ekawēn tup:

“Õn ma xipacat o'ğũm soat ka watwat pe, ēn etabut okay buye,” i'e'em Deus Abraão be, i.

Imēn Deus kawēn idipat o'ğuwēn Abraão be xipacat ũm awap soat ka watwat pe. ⁹ Abraão itabut cīcā osunuy Deus kay. Imēnpuye Deus xipacat o'ğũm cebe. Ixe-buxim soat itabucayũ dak xipacat jeejat Deus xewi.

¹⁰ Imēn e'em Deus ekawēn tup:

Wũy ma jeedop ip Deus wi ipiat'ajojom wuyawẽwẽap ekawẽn tağ jekukum'ũm pima, soat ekawẽn tağ jekukum'ũm pima, i.

Imẽnpit iba'ore soat pe wuywebe soat ekawẽn tağ wuyeku am wuyawẽwẽap ekawẽn tağ. Imẽnpuye:

— Xipat ġu eyju oxe — i'e'em Deus soat pe— “Wuyawẽwẽap ekawẽn tağ wuyeku buje acã cũğ ma acesop Deus xe” i'e'e'ukayũ be.

¹¹ Deus cuk adi o'e:

— Eyetabut okay bima acã, cũğ ma epesop oxe — i.

Imẽnpuye wuyawẽwẽap ekawẽn tağ wuyekup puye ġu cũğ ma acesop Deus xe. Iměntak e'em Habakuque ekawẽn tup—kuyjeat ekawẽn tup—Deus ekawẽn muwěnuwě'n'ukat ekawẽn tup:

Itabucat ma cũğ ma Deus xe, i. Soat em itait jeenuy Deus xe, i.

¹² Imẽnpit itabut'ũmat tak wuyawẽwẽap ekawẽn tağ jeku ojuy. Iměntak e'em Deus ekawẽn tup:

Wuyawẽwẽap ekawẽn tağ jekuku'ukat acã cũğ ma jeenuy Deus xe—soat ekawẽn tağ jekuku'ukat, i. Soat em itait jeenuy Deus xe, i.

¹³ — Xipat ġu ĩn oxe — i'e'em Deus soat pe—ikěreát mujurũğrũğ'ukayũ be.

Cristo bit oe'ũ apěn cuk adi ikěreát ağujurũğrũğiap teida am. Iměn e'em Deus ekawẽn tup:

Korosa eju ibamupayaat wũy ma jeenuy Deus wi ipiat'ajojom ikěreát kuğ puye, i.

Korosa eju bima: — Wũy ma juy eğuy owi ipiat'ajojom ikěreát kuğ ĩn puye — io'e Deus Jesus pe. Wuywebe ġu iměn o'e. Jesus pe acã iměn o'e, apěn cuk adi ikěreát ağujurũğrũğiap kuğ puye. ¹⁴ Deus

o'e Abraão be: — Xipacat oğũm soat ka watwat pe, ãn etabut okay buye — i.

Jesus Cristo kay Judeu'ũmayũ itabun puje, Deus xipacat je'ğũm cebe ip. Xipacat je'ğũm cebe ip korosa eju Cristo apẽn cuk adi ikẽrẽat agujurũğrũğ iap o'tujowat jewebe buye. Imẽnpuye Deus jebiõğbuk muõmõm wuywebe wuyetabut puye. Imuõmõm wuywebe apẽn cuk adi o'e Abraão be iap tağ.

¹⁵ Okitpitpiyũ, apẽn jebapukpuğ soat kabia wuywebe iap tağ õn jeymutaybin. Abu wuybubut je'jat wuye'ũ buje iaptup mubararak pin pima, wuyju wuybutet mubarararağ ixedup pe. Wuybure dak jebetet mubarararağ ixedup pe. Xepxep putet mubararak puje, iba'ore warara'acat pe iboaptup ekawẽn mupubut am. Iboaptup ekawẽn muwarurun am tak iba'ore ma cebe ip.

¹⁶ — Xipacat oğũm ewebe, enaxeğebit pe dak — i juk adi o'e Deus Abraão be.

“Enaxeğebitbiyũ be” i'ũmğu e'em ibodup. “Enaxeğebit pe” i acã e'em. Adeayũ be ğu kuka xipacat o'ğũm. Pũğ pe ma kuka o'ğũm—Cristo be ma. ¹⁷ Imẽn õn e ojuy eywebe. Deus cuk kuy o'e Abraão be:

— Xipacat oğũm soat ka watwat pe, ãn etabut okay buye — i. — Soat em wa'õ dağ õn e'em — i juk o'e.

Gũyjom acã wuyawẽwẽap ekawẽn o'ğuwẽn Moisés pe ixẽ be imuwẽn ãm jebekitkit pe—430 koato kap puje ma. Wuyawẽwẽap ekawẽn muwẽn puje bit:

— Obu'u oce xipacat ãm ãm Abraão be ğasũ bit — i'ũmğu o'e Deus. — Apẽn cuk oce cebe iap tağ ğu oce ğasũ bit — i'ũmğu o'e.

¹⁸ Wuyawēwēap ekawēn tağ wuyekuap puye Deus xipacat ūmũm wuywebe bima, apēn cuk adi o'e Abraão be iap tağ ġu kuka o'ğũm wuywebe. Imēnpit Deus xipacat o'ğũm Abraão be “Xipacat o'ğũm ewebe ēn etabut okay buye” io'e buye. Deus ja'õ dağ e'em soat em.

¹⁹ — Apēnpuye dak Deus wuyawēwēap ekawēn o'ğuwēn Moisés pe? — i du eyju e'em owebe?

Õn jeymutaybin. Wuyawēwēap ekawēn o'ğuwēn wuymutaybit am ajo Deus bikuyap tağ ġu iam. Guyjom kuka Abraão naxegebit o'kap—Jesus Cristo. Deus xipacat kuka o'ğũm cebe ja'õ dağ. Ikap'ũm pima bit, kuy juk adi wuyetaybit ajop soat ipi juacat kũyjobit'ũm ip Deus a'õ kay iam. Deus ma o'jekawēn Abraão be.

— Xipacat o'ğũm ewebe — i juk o'e cebe.

Wuyawēwēap ekawēn muwēn pin pima bit, ijodiacat eju ġu o'jekawēn. Koap jekawēn tojotjot'ukayũ be o'ğuwēn. Ixeyũ o'ğudot jekawēn muwēn âm ijodiacat pe. Ijodiat ma ġuwēn iboap wuywebe.

²⁰ Wuyju warara'acat mujujum wuybure kay imukũyjo pin pima. Imēnpuxim Deus ixeyũ o'ğudot ijodiacat mukũyjo am, ixeyũ be “Ha'a, ijop ekawēn tağ cuy ajeku” i'e am. Deus pit pũğ ma. Wuyju imujuap wiwim ġu Deus, ja'õbi ma e'em puye. Wuywebe bit iba'ore imuju am. Iba'ore wuywebe “Ēn imēn ece'e. Õn tak wara'at tağ oce” i'e am Deus pe, ixu mujujum ġu wuyju buye. Ja'õbi ma: — Xipacat o'ğũm ewebe — i juk o'e Abraão be.

²¹ — Eyetabun puje acã cũğ ma epesop oxe — i'e'em Deus.

— Cũğ ma epesop oxe eyawēwēap ekawēn tağ eyeku buje acã — i dak tu e'em wuywebe?

Xepxep ekawēn taḡ tu Deus e'em wuywebe? Ka'ũma! Deus pe wuymucũḡ put wuyawēwēap ekawēn muwēn ãm ibima, “Eyawēwēap ekawēn taḡ eyeku buje acã cũḡ ma epesop oxe” i kuka juk o'e Deus wuywebe. ²² Imēn e'em Deus ekawēn tup:

Soat ipi watwat ikērēat kuḡ, i.

Iba'ore soat pe wuywebe wuyawēwēap ekawēn taḡ wuyeku am—soat ekawēn taḡ. Imēnpuye pũḡat kay wuyetabun puje acã cũḡ ma acesop Deus xe—Jesus Cristo kay wuyetabun puje acã. Soat ixē kay itabucayũ xipacat jeejat Deus xewi “Xipacat oḡũm soat pe itabucat pe” io'e Deus puye.

²³ Kuy hima juk adi wuyetaybit ḡu ajop wuyetabut am. Warara'acat pe wuymutaybicat wiwim cuk adi ajop wuyetabut am Jesus kay. Taomũnmũnat puxim cuk adi ajop wuyawēwēap ekawēn taḡ jeku ojuy. ²⁴ Bekitkit puxim cuk adi ajop. Bekicat kukat puxim wuyawēwēap ekawēn wuykuḡ osunuy. Ikukat bekicat mukũyjojom ixē be warēmtaḡ ma jekuap puxim. Imēnpuxim wuyju dak wuyawēwēap ekawēn taḡ cuk adi ajekuku warēmtaḡ ma wuyekuap puxim. Cristo ajēmap wiwim cuk adi ajop. Yajēm'isum cũḡ ma acesop Deus xe Cristo kay wuyetabucam acã.

²⁵⁻²⁶ Gasũ bit wuyetabut Cristo kay. Mũḡ'i wuyju ceweju. Ixē kay wuyetabun puje bekkit puxim ḡu ajop. Deus ipotpoyũ ma ajop yaypanayũ buxim. Imēnpuye wuyawēwēap ekawēn taḡ ḡu ajeku ḡasũ bit. Bekicat ikukacecat puxim ḡu wuyju. ²⁷ Eyetabun puje, kuy juk eymubatisas-anat “Jesus eju mũḡ'i ojeku ḡasũ bit” i'e am soat pe. Gasũ bit Cristo eju mũḡ'i eyju jekukum. Cristo buxim epeku. ²⁸ Cristo eju mũḡ'i jekukum pima,

Judeu, Judeu'ũmat tak weḡũḡũn ma ip jekukum. Tei'ũma kapikpik'ukat, teibubum kapikpik'ukat tak weḡũḡũn ma ip jekukum. Ayacat, aḡokatkat tak weḡũḡũn ma ip jekukum, Jesus Cristo eju mũḡ'i jekukum pima.

²⁹ — Xipacat oḡũm enaxeḡebit pe — i juk adi o'e Deus Abraão be. Cristo eykukat. Imēnpuye Abraão naxeḡebitbicat eyju Deus xe. Imēnpuye xipacat epejat Deus xewi apēn ixē juk adi o'e cebe iap taḡ.

4

¹ Gebum cuy ajop apēn ipotpoyũ jebay bubut pum iap kay.

— Yaypan pima acã okpot soat obubut je'jat jebubun — i'e'em cebay.

Yaypan'ũm pima bit, jebay eju kapikpik'ukat co'i ma ipot. Yaypan pima acã soat kuḡ jeenuy—jebay bubut kuḡ. ² Yaypan'ũm pima, warara'acayũ bekicat kuḡ imukũyjom. Warara'acayũ cebay bubut kuḡ, cebay ekawēn taḡ ma. ³ Bekicat yaḡuy'ũm bekin pima. Bekitkit puxim wuyju dak ajop wuyetabun'isum Jesus kay. Tũybe wuyawēwēap ekawēn taḡ wuyekuap tomuju cũḡ ma acesop Deus xe iãn cuk adi ajop. ⁴ Imudocap kabia ajēm puje, Deus jekpot o'ḡudot ijodi. Wuyjo'i o'kap ayacat'uk pewi. Wuyawēwēap ekawēn taḡ cuk adi oekukuku Judeu buye.

⁵ — Iba'ore ocewebe soat ekawēn taḡ jeku am ocawēwēap ekawēn taḡ — i'e'e'uk ajop Deus pe. — Apēntak cũḡ ma acesop cexe? — i'e'e'uk ajop wuyewewebe.

Jesus pit e'em wuywebe:

— Wa'õbacaap oğũm eywebe—eyawẽwẽap ekawẽn tağ eyku am ġu—Deus ebekitkiyũm eye'e am acã! — i.

⁶ Ixe Deus cuk jekpot biõğbuk o'ğũm wuywebe “Eyju dak okpotpoyũ” i'e am wuywebe. Imẽnpuye:

— Bay! — i wuyju dak e'em cebe Jesus a'õ nomuju. — Bay — i'e'em wuyju ibiõğbuk a'õbi.

⁷ Deus eju kapikpik'ukayũ ġu a'ğũ eyju. Ipotpoyũ ma eyju. Imẽnpuye soat je'ğũm eywebe jekpotpoyũ be iũmũmap.

⁸ Kuy bima juk adi eyetaybit ġu epesop Deusan. Warara'acayũ kay juk adi eyetabut epesop. Tũybe iteyũ ma deusyũ iãn cuk adi epesop. ⁹ Gasũ bit eyetaybit Deusan. Ixe dak o'e itaybit eyjum. Apẽnpuye dak waram eyetabut pin ma'ğuto deusbaroyũ kay? Te'e ma kuka eyetabut epesop cekay ip. Wuybuywan pa'ore ip cebe itaybit'ũm puye. Te'e ma du ixeyũ a'õ kay epe'e ġuto? Eyağuyba'arẽm!

¹⁰ Tũybe cũğ ma acesop Deus xe kabia muxipanpan pima iãn eyju e'em, kaxi muxipanpan pima dak iãn, koato muxipanpan pima dak i'an eyju e'em. ¹¹ Wağuybabi'ũm'ũm cĩcã eykuğ. Te'e ma du juk adi ocekapik kawẽn idipat muwẽnuwẽn eywebe? Wağuybabi'ũm'ũm cĩcã eykuğ.

¹² Okitpitpiyũ, Cristo a'õ kay kũyjobin cuy epesop obuxim. Õn tak eybuxim ya'õ kay. Õn cuk adi eyburem oğuy. Eyju dak cuk adi warẽmtağ ġu epesop okuğ. ¹³ Koap weku buje, kawẽn idipat epeya'ĩjojo ġu buk. Õn pit cuk oju imuwẽn ãm eywebe owãtaxipi buye. Oju ġu wara'at ka kay. ¹⁴ Eyağuybabi'ũm'ũm cuk adi epesop okuğ

owātaxipi buye. Owātaxiapi waywayway ġu juk adi epesop.

— Paulo kay ġu oceju soat em iwātaxipi buye — i'ũmġu juk adi epe'e'e.

Eyduk'a be juk adi eyju okuk. Xipan cuk adi eyju okuk kabi bewiat kukap puxim—Deus ekawēn tojotjot'ukat kukap puxim—Jesus Cristo kukap puxim. ¹⁵Eycokcoġ cuk adi epesop okuġ. Okay jġjã juk adi epesop. Apēnpuye dak epe'e okay ġu ġasũ bit? Iba'ore'ũm pima eyeta kuka juk epesutaũm owebe wetam. ¹⁶Icēmān acã juk adi ocekawēnwēn eywebe. Apēnpuye eyju ġasũ okay ġu?

¹⁷Jewexe ma ip eykay ixeyũ warēmtaġ ma ey-mutaybitbin'ukayũ. Eymu'aġuyba'arēm ojuy ip okay'ũm ãm. Ibu'u ip eywebe okay am. İbikuy ip jewekay i'e am apēn kuy bima okay jġjã epesop iap puxim. ¹⁸Xipat wuywebe warara'acat kay am xipat i'e ojuy bima. İxeyũ mu'aġuyba'arēm ojuy bima bit, xipat ġu kuka o'e cekay am. İboap icēmān soat em. Eykukpin cġcã oxe, eyxe ġu'ma'ġu òn. ¹⁹Bekitkit, eykukpin cġcã oxe. Ayacat i'itpiat puxim òn. Waġuybabi'ũm'ũm cġcã eykuġ. Cristo ekukuap puxim eyju dak jekukum iap wi-wim òn ayacat je'it kapap wiwim iap puxim. ²⁰Waġuybabi'ũm'ũm cġcã eykuġ. Eyxe pin cġcã oxe. Apēntak òn jeyawē?

²¹ — Moisés ekawēn taġ cuy ajeku—wuyawēwēap ekawēn taġ — i te'e ma eyju e'em.

Eyetaybit tu apēn wuyawēwēap ekawēn e'em iam? ²²Gebum cuy epesop Abraão ipotpoyũ kay—xepxepayũ kay. Xepxep osodop ip Abraão

ipotpoyũ. Pũğ ma ixi tei'ũma kapikpik'ukat osunuy Abraão duk'a be. Wara'at xi bit Abraão tayxiat osunuy. ²³ Kapikpik'ukat it o'kap wuykapap puxim. Itayxiat it pit Deus a'õbi o'kap. O'kap “Ekpon oğũm ewebe” io'e buye. ²⁴ Xepxep aoyũ xepxep em Deus jekawẽn o'ğuwẽn jebekitkit pe iap puxim. Jekawẽn o'ğuwẽn jebekitkit awẽwẽ ãm. Co'a bicũğpe bima o'ğuwẽn Moisés pe, Sinai'a bicũğpe bima. Wuyawẽwẽap ekawẽn tağ jeku ojuyayũ tei'ũma kapikpik'ukat it puxim—Agar it puxim. ²⁵ Agar co'a buxim—Sinai'a buxim—Arábia eipi beat'a buxim.

— Wuyawẽwẽap ekawẽn tağ wuyekuap tomuju acã cũğ ma acesop Deus xe — i te'e ma e'em pũğpũğayũ. Agar it puxim ixeyũ—Ismael buxim—tei'ũma kapikpik'ukat it puxim. Jerusalém ka ixeyũ Judeuyũ ka. Ixeyũ a'õ kayayũ dak wuyawẽwẽap ekawẽn tağ jeku ojuy cũğ ma i'e am Deus xe. ²⁶ Wara'at ka bit opop. Jerusalém ka buxim ibo ka. Kabi bewiatka bit ibo ka. Wuyju ma ibo ka watwat. Itayxiat it puxim wuyju—Isaque buxim.

— Cũğ ma wuyju Deus xe wuyetabut puye — i wuyju e'em.

²⁷ Imẽn e'em Deus ekawẽn tup:

Tũ'ũ, ecokcoğ cuy eğuy e'it'et ğu ma'ğũ ãn, i.
 Ecokcoğ cuy eğuy e'it esupi'ajo ğu ma'ğũ ãn, i.
 Ayacat o'jepere iat iyũ ade je'e—jektopen nuyat iyũ bodi ma, i.

Imẽn e'em Isaiás emudupmubararaktup.

²⁸ Okitpitpiyũ, Deus a'õbi Isaque o'kap. Ixe buxim eyju dak ya'õbi Deus ipotpoyũm epesop.

29 Wuykapap puxim o'kapiat Deus biõğbuk a'õbi o'kapiat kaykay jĩã osunuynuy. Ibabiwarere osunuynuy cekay. Iwaywayway acã osunuynuy. Gasũ dak imẽn ma jebapukpuğ iboap. Wuykapap puxim o'kap'iaiyũ Deus biõğbuk a'õbiayũ kaykay jĩã. Iwaywayway jĩã ip. Warẽmtağ ip ikuğ. 30 Imẽnpit, imẽn e'em Deus ekawẽn tup:

“Tei'ũma kapikpik'ukat cuy eğujẽm eduk'a bewi,” i juk o'e Deus Abraão be, i. “Eğujẽm cuy i'it eju ma,” i. “Etayxiat it puxim ğu ixẽ it,” i. “Jebay bubut je'jat ğu,” i. “Etayxiat it acã je'jat,” i.

31 Imẽnẽju, okitpitpiyũ, ğebum cuy epesop iboap ekawẽn kay. Tei'ũma kapikpik'ukat it puxim ğu wuyju—itayxiat it puxim acã.

5

1 Cristo juk ja'õbacaap o'ğũm wuywebe wuyjupinap tağ wuyeku am. Ixe a'õbacaap kuğ cuy epesop soat em.

— Wuyawẽwẽap ekawẽn tağ cuy ajeku cũğ ma wuydop am Deus xe — i waram pit cuy epe'e ğu. Tei'ũma kapikpik'ukat puxim ğu juy epesop waram.

2 Eya'õpicũğcũğ cuy epesop wekawẽn kay! Õn Paulo. Judeu õn. Jesus kay bit wetabut. Õn ma jeymukũyjo. Warara'acat pe eydaypu'ağobixeedakacan pima, te'e ma kuka juk Cristo oe'ũ eywebeam. 3 Imẽn ma õn eymukũyjom.

— Soat ekawēn tağ cuy epeku wuyawēwēap ekawēn tağ—Moisés ekawēn tağ — i ñn e'em soat pe o'jewedaypu'ağobixeedakacat'iaiyũ be.

⁴ “Cũğ ma acesop Deus xe wuyawēwēap ekawēn tağ wuyju jekukum puye” i'e'e'ukayũ wũy ma ip Cristo wi. Jetabucap kuy o'jepere ip. Ibu'u ip Deus pe xipan jekukan. ⁵ Wuyju bit wuyetaybit cũğ ma acesop Deus xe wuyetabut Jesus Cristo kay buye iam. Cũğ ma acesop cexe iap wiwim cĩcã wuyju. Iboap wiwim cĩcã wuyju soat em Deus biõğbuk wuya'õmucanucan puye. ⁶ Jesus Cristo eju mũğ'i wuyju jekukum pima, yoboğ ğu Deus xe wuydaypu'ağobixeedakatkan pima, ixeedakatkan'ũm pima dak. Yoboğ pit cexe wuyetabucap acã. Wuyetabut pima xipan tak acejewekuk.

⁷ Kuy juk adi eyetabut cĩcã epesop Jesus Cristo kay. Abu juk kawēn icēmat kay eymubu'un? Apēn cuk eymubu'un? ⁸ Apēn xe'e ixē eyağuyumuwarurun? Deus ğu eyağuyumuwarurun. Deus ğu eymubu'un. Ixē juk eynaē cũğ ma eyeku am jexe.

⁹ — Tõm'ĩt ma soat'a muyuhuhum—pão'a muyuhuhuptõm. Yaboğ e'em — i wuyju e'em. Imēnpuxim pũğ ma warēmtağ ma eymutaybitbin pima, soat kuka warēmtağ ma epeku.

— Wuyawēwēap ekawēn tağ wuyekuap tomuju cũğ ma acesop Deus xe — i kuka o'e soat te'e ma.

¹⁰ Ñn pit wetabut mabuk eykay. Wetaybit waram ğuto eyağuyusat epe'e iam. Waram ğuto kawēn icēmat kay epesop. Wetaybit iboam mũğ'i wuyju wuykukukat eju buye. Warēmtağ

ma eymutaybitbin'ukat pe bit Deus ipiat supi'ajoat—ya'õbuyxi'ũmat pe, ya'õbuyxiat pe dak.

¹¹ Okitpitpiyũ, okay'ũmayũ te'e ma wawẽgmukẽrẽrẽn.

— Paulo e'em wuywebe “Jewedaypu'ağobixeedakatkacan cuy epesop”, i — i napa ma e'em ip soat pe.

Kuy bima juk adi ocece iboam soat pe. Gasũ bit oce ğu imẽn. Imẽn õn e'em pima, itakoma ğu kuka adi Judeuyũ okay. Ixeyũ ma e'em imẽn soat pe. Õn pit e'em:

— Cũğ ma epesop Deus xe eyetabut pima Jesus oe'ũ korosa be wuywebeam iap kay — i.

Imẽnpuye buk ip itakoma ma okay.

¹² “Jewedaypu'ağobixeedakatkacan cuy epesop Moisés ekawẽn tağ” i'e'e'ukayũ be bit:

— Epeyewedaxibada'uk cuy pũğ em ma — i õn e'em.

¹³ Okitpitpiyũ, Deus cuk wuynaẽ wuyjupinap tağ wuyeku am. Imẽnpit:

— Obikuyap tağ cuy ojeku jewemucokcokcoğ, Deus onaẽ ojupinap tağ weku am puye — i'ũmğ u juy epe'e.

Eybikuyap tağ ğu juy epeku jewemucokcokcoğ. Xipan cuy epeyewekuk. Jewebuywatwan tak cuy epesop!

¹⁴ Imẽn e'em wuyawẽwẽap ekawẽn tup: Xipan cuy warara'acat ejukuk ewekukap puxim, i.

Eywebe xipan warara'acat kuğ pima, wuyawẽwẽap ekawẽn tağ eyju jekukum soat ekawẽn tağ.

¹⁵ Ika'uat puxim jewewekuğ pima bit, kuka xipan jewewekuap epeyepere, jewemuymuy bima dak, jewawẽgmukẽrẽrẽn pima dak.

16 Õn mabuk jeyawẽ. Eybikuyap tağ ğu juy epeku jewemucokcokcoğ. ãğ cuy Deus biõğbuk jeyağuydada. Ixe eyağuydadam pima warẽmtağ ğu kuka epekuku ikẽrẽat muğẽğẽm. 17 Ajo Deus biõğbuk cekay iap ajo wuyju cekay iap ğu. Apẽn Deus biõğbuk ibikuy iap puxim ğu wuyju bit wuybikuy. Apẽn wuybikuy iap puxim ğu dak Deus biõğbuk pit ibikuy. Deus biõğbuk bikuyap tağ jekuku'ukat jebikuyap tağ ğu jekukum jewemucokcokcoğ. Imẽnpuye ixe biõğbuk bikuyap tağ jeku pin pima, wuybikuyap tağ ğu kuka ajekuku—ixe bikuyap tağ acã. 18 Deus biõğbuk wuyağuydadam pima, wuyawẽwẽap ekawẽn tağ ğu kuka ajeku cũğ ma wuydop am Deus xe—kawẽn kuyat tağ ğu.

19 Wuybikuyap tağ jekukum pima, ikẽrẽat acã kuka ağũğẽ. Soat wuyetaybit iboam. Wuybikuyap tağ jekukum pima, warara'acat itop kaykay kuka ajop, warara'acat tayxi dak; ikẽrẽat kay acã dak kuka ajop ğebum; wuyekawẽnkẽrẽm tak kuka ajop; 20 deusbaroyũ kay dak kuka ajop wuyetabun; wuybukaypan tak kuka ajop; warara'acat aoka pin tak kuka ajop; jewa'õxikxiğ tak kuka ajop; wuyetakomãmãm tak kuka ajop warara'acat kay; wuyetabikukum tak kuka ajop soat kay; wuya'õbuyxian pin tak kuka ajop; wuyewejak'ũm tak kuka ajop wuybureyũ kay; 21 wuyetabutkarey dak kuka ajop; wuyka'o'om tak kuka ajop; jewetabutpe ma kuka ajop aoyũ dabi'o'om peta muğẽğẽm pima. Wuybikuyap tağ jekukum pima, warẽmtağ ma kuka ajop. Deus soat kukukan pima, jeõm ğu ip kabi be imẽn jekuku'ukayũ. Imẽn cuk oce eywebe. Gasũ dak

imēn ma òn e'em eywebe.

²² Deus biōḡbuk wuyaḡuydadam pima bit, ikukpin kuka warara'acat ajukukuk; wuycokcoḡ tak kuka ajop soat em; wuyaḡuybabibim tak kuka ajop; wuyukpiceḡēm ḡu dak kuka ajop; wuya'ōdidim tak kuka warara'acat ajukukuk; xipan tak kuka warara'acat ajukukuk; wuya'ō daḡ tak kuka ajekuku soat em; ²³ wuya'ōbuyxian pin ḡu dak kuka ajop; jewawēwēm tak kuka ajop ikērēat muḡēap puxim. Imēn wuyju jekukum pima, wuyawēwēap ekawēn taḡ kuka ajeku—kawēn kuyat taḡ. ²⁴ Jesus Cristo ebekitkiyū wuyju. Imēn wuyju jewawēwēm.

— Cristo oe'ū korosa be owebeam — i'e'em wuyju jewebe ma. — Ixe buxim oe'ūiat puxim cuy ojeku. Jewemucokcokcoḡ obikuyap taḡ ḡu juy ojeku — i'e'em wuyju jewebe ma.

Imēn wuyju jewawēwēm. ²⁵ Kuy hima Deus biōḡbuk wuymutabun Jesus Cristo kay. Āḡ cuy ḡasū bit ixē wuyaḡuydada. ²⁶ Wuya'ōbuyxian pin ḡu juy ajop. Warara'acat aḡutakomān ḡu dak cuy. Wuyetabutkarey ḡu dak cuy ajop warara'acat kay.

6

¹ Okitpitpiyū, wuybure be ikērēat muḡē buje, ixē juy epeyawē. Deus biōḡbuk a'ō kay kūyjobicat cuy ixē yawē. Eywebe dak xipāt'ūmat imuḡē ḡūḡūn ixē buxim. Imēnpuye eyday'em'um cuy epesop eywebe ikērēat kukap puxim. ² Jewebuywatwan cuy epesop. Jewebuywatwan pima, kūyjobit epesop Cristo a'ō kay. ³ Ya'ōbuyxi'ūmat “Ōn pit wa'ōbuyxi. Osubuywan ḡu warara'acat” i'e'em pima, jewēḡuykukukum. Te'e ma e'em — Cristo

ebekit òn — i. ⁴ Gebum cuy ajop wuyekukuap kay wuyetaybit am cūḡ ma oceju jekukum iam, cūḡ ḡu iam tak. Cūḡ ma jekukum pima, wuyocokcok ace'e wuyekukuap kay.

— Ibo ekukuap co'i du wekukuap xipat Deus xe? — i ḡu kuka ace'e.

⁵ Soat ma juy wuyekapikap ajukuk.

⁶ Warara'acat pe Cristo ekawēn wuymutaybitbin pima, wuybubut'in cuy aḡu'ē'ē cebe wuymutaybitbinapteim. ⁷ Jewemuḡuykukukum ḡu juy epesop. Deus ya'òmupubutpun pa'ore soat pe wuywebe. Ajo ataida iat tak kuka ajat ma.

⁸ Imēnpuxim jewemucokcokcoḡ wuybikuyap taḡ jekukum pima, ikērēat kuka aḡujurūḡ. Wuye'ū buje Deus wi wūy ma acesop. Deus biōḡbuk mucokcokcoḡ ixē bikuyap taḡ jekukum pima bit, idipat kuka aḡujurūḡ ixē a'òbacaan, ibiōḡbuk wuyāḡuydadam pima dak. Wuye'ū buje, waram acejetait. Deus xe acesop soat em. ⁹ Wuybu'u'um ḡu juy ajop xipacat muḡē ām. Xipacat puap kabia be xipacat acejat wuybu'u'u'ūm pima. ¹⁰ Imēnpuye xipan warara'acat kukap cuy acejepere ḡu. Warara'acat podi ma itabucayū ajukuk xipan.

¹¹ Obum ma ijudup mubarararaḡ òn. Yoboḡ cīcā wemumubararak. ¹² Xipan jewemuwēnuwēnayū ma e'em eywebe:

— Jewedaypu'aḡobixeedakatkacan cuy epesop cūḡ ma Deus xe eydop am — i.

Yoboḡan pin ip. Jesus Cristo oe'ū korosa be iap muwēn pu'u jījā ip. Iparara ip Jesus Cristo kay'ūmayū ipiat supi'ajoat cebe ip iap puxim.

¹³ Jedaypu'aḡobixeedakatkacat ip. Soat taḡ ḡu bit

ip jekukum wuyawẽwẽap ekawẽn tag ġu. Eywebe jewedaypu'aġobixeedakatkacat ojuy ip, “Ade ma oca'õ kay kũyjobit” i'e ojuy ip puye.

¹⁴ — Mẽnku xipat wuywebe cũġ ma wuydop am Deus xe, ġoku ġuto — i'ũmġu õn pit e'em. — Wuykukukat Jesus Cristo oe'ũ korosa be wuywebe cũġ ma wuydop am Deus xe — i acã õn e'em.

Jesus kay'ũmat ekukuap puxim ġu weku pin ġasũ bit. Idip ġu o'e oxe iboap pit. Jesus kay'ũmayũ dak jeku pin ġu wekukuap puxim. Idip ġu cexe ip iboap. ¹⁵ Wuyaguy'isu bima, yoboġ ġu Deus xe wuydaypu'aġobixeedakatkacat pima, ix-eedakatkacat'ũm pima dak. Ibitbit ma. Yoboġ pit cexe wuy'isum wuyeku am. ¹⁶ Õn kawẽnwẽn Deus eju yaġuy'isum jekuku'ukayũ beam—Deus ebek-itkit peam.

— Bay, ebekitkit aġuymubabibin cuy eġuy — i õn e'em cebe. — Etabotaidabotbon cuy eġuy cekay ip — i õn e'em cebe.

¹⁷ Okaykay ġu juy ip jeedop. Wa'õmukorẽm ġu juy jeedop ip jewedaypu'aġobixeedakatkacan iam. Kuy werowero opop wukxabi daġ ade. Iboap coco buje, itaybit je'e ip Paulo kapikpiġ cĩcã wuykukukat Jesus peam iam.

¹⁸ Okitpitpiyũ, “Xipan cuy Galácia eipi watwat ejukuk” i õn e'em wuykukukat Jesus Cristo be. Xipan cuy jeykuk. Ibũrũn ma.

**Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)**

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

82289dff-6b79-5335-974c-563b93a888ae